

◎法彌陀因行

於是法藏比丘，具足修滿如是大願，誠諦不虛，超出世間，深樂寂滅。阿難，法藏比丘，於其佛所，諸天魔梵，龍神八部大眾之中，發斯弘誓，建此願已，一向專志，莊嚴妙土。

所修佛國，開廓廣大，超勝獨妙，建立常然，無衰無變。於不可思議兆載永劫，積植菩薩無量德行。

不生欲覺、瞋覺、害覺，不起欲想、瞋想、害想，不着色、聲、香、味、觸、法。

忍力成就。不計眾苦，少欲知足。

無染恚癡，三昧常寂，智慧無礙。

無有虛偽，諛曲之心，和顏愛語，先意承問。

勇猛精進，志願無倦，專求清白之法，以惠利羣生。

恭敬三寶，奉事師長，以大莊嚴，具足眾行，令諸眾生，功德成就。

住空無相無願之法，無作無起，觀法如化。

遠離粗言，自害害彼，彼此俱害。

修習善語，自利利人，人我兼利。

棄國捐王，絕去財色，自行六波羅蜜，教人令行。

無央數劫，積功累德。

隨其生處，在意所欲，無量寶藏，自然發應。教化安

立無數眾生，住於無上正真之道。

或為長者居士，豪姓尊貴，或為刹利國君，轉輪聖帝

。或為六欲天王，乃至梵王，常以四事，供養恭敬一切諸

佛。如是功德，不可稱說。口氣香潔，如優鉢羅華。身諸

毛孔，出栴檀香，其香普熏無量世界。容色端正，相好殊

妙。其手常出無盡之寶，衣服飲食，珍妙華香，銷蓋幢幡

，莊嚴之具。如是等事，超諸天人。

於一切法，而得自在。

（恭錄《佛說無量壽經》曹魏 康僧鎰 譯本）